

Agenzie Regjonâl pe Lenghe Furlane e Societât Filologjiche Furlane: insieme par un Centri di documentazion didatiche pe lenghe furlane

Al scomence il projet Docuscuele

Meti adun e implementâ il **Centri di documentazion, ricercje e sperimentazion didatiche pe scuele furlane: Docuscuele**. Al è l'obietîf principâl dal **Protocol di intese firmât a Udin di Lorenzo Fabbro, president de ARLeF (Agenzie Regjonâl pe Lenghe Furlane) e di Federico Vicario, president de Societât Filologjiche Furlane**. Al esist za un prin nucli dal Centri, viert li de sede de Societât Filologjiche Furlane a Udin, li che al è za cuasi un miâr di publicacions ma, a chest prin lavôr di racuelte e sistematizazion, al covente dâ gnûfs stimuli e contribûts economicis (furnîts de ARLeF), par ufrî ancje continuitât ae formazion culturâl, professionâl e linguistiche dai insegnants di lenghe furlane, inviade e disvilupade, di tancj ents, intai agns passâts. Cun di plui, al è indispensabil che, in rispueste aes lôr esigjencis professionâls, chescj docents a puedin vê a disposizion risorsis culturâls adeguadis e ancje materiâi par integrâ e disvilupâ la preparazion iniziâl cul studi e l'impegn individuâl.

*«Docuscuele al è un altri projet strategjic di politiche linguistiche e di educazion plurilenghâl che al à il fin di meti in rêl projects e competencis e di creâ ocasions di confront, di inricjiment e di ideazion – al dîs **Fabbro** -. Par chest, la Agenzie e varà compits di direzion e di coordinament dal projet ancje cul supuart dal propri Comitât tecnic scientific e al metarà a disposizion dal Centri lis risorsis economicis pal so funzionament e pal disvilup dai varis programs che a saran sovedut su la didatiche inovative e la formazion».*

*«Par nô e je une grande sodisfazion viodi ricognossude, in graciis de Regjon e de ARLeF, la funzion strategjiche dal Centri su la scuele furlane - al zonte **Vicjari** -, un pont di riferiment pai insegnants impegnâts inte introduzion de marilenghe intai programs formatîfs dai istitûts dal nestri teritori. Il furlan al è une ricjece, pai nestris fruts e pai nestris fantats, al è un valôr fundamentâl par dute la comunitât, e je une sfide che si pues vinci cu la cualitât e la continuitât des azions che o rivarin a meti in cjamp: la colaborazion tra lis istituzions al è un segnâl une vore positîf, un segnâl che nus fâs plui fuarts e nus permet di cjalâ cun fiducie al doman».*

*«Fâ partî il Centri e dâi continuitât al è impuartant stant che chest al judarà – e marche la assessore regjonâl pal Lavôr, formazion e istruzion, Loredana **Panariti** – su la fonde des esperiencis presintis in altris contescj talians e internazionâi e dal fat di no podê fâ di*

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<

mancul di un insegnant di lenghe furlane bon di promovi l'aprendiment de lenghe minoritarie intal cuadri de educazion plurilengâl, a meti i insegnâts di lenghe furlane intes cundizions di confrontâsi te suaze culturâl e in maniere professionâl cui coleghis de proprie scuele, di altris contescj talians minoritaris e europeans e cun ducj i interlocutôrs interessâts ai problemis de scuele e de educazion».

Pal coordinament des ativitâts e la realizazion dai obietîfs previodûts dal Protocol, dentri di 30 dîs de sotscrizion al vignarà metût adun un comitât tecnic di pueste, li che a saran dentri un rapresentant di ognidun dai sogjets aderents, e ancje trê esperts di dissiplinis leadis aes ativitâts dal Centri nomenâts de ARLeF che e gjestirà ancje la presidence.

Udin, ai 5 di Dicembar dal 2016

INFORMAZIONS PE STAMPE - INFORMAZIONI PER LA STAMPA

Ufficio Stampa ARLeF CALT relazioni pubbliche Tel. + 39 0432 229127 / **e-mail: arlef@caltpr.it**
Adriano Del Fabro - mob. + 39 338 3245229 / Adriana Cruciatti - mob. +39 335 6853775

<<<<<<<<<<<<